

- लोकसभा अध्यक्ष ओम बिरला संसद रा सियाळू सत्र री कार्यवाही ठीक ढंग ऊं चलावण सारू न्यारी—न्यारी पार्टियां रा सांसदां सागे मीटिंग कीनी।
- प्रधानमंत्री नरेन्द्र मोदी रो ई महीना जयपुर मांय—राइजिंग राजस्थान ग्लोबल इन्वेस्टमेंट समिट अर भजनलाल सरकार री पहली वर्षगांठ रे मौके राख्या जावण वाळा आयोजनां मांय शिरकत करण रो कार्यक्रम।
- उपमुख्यमंत्री दिया कुमारी कह्यो—प्रदेश मांय बेगी ई नुवी पर्यटन नीति लागू करी जावेला।
- दिसम्बर रो महीनो सरू व्ह्यां पाछे ई राज्य मांय ठण्ड रो ज़ोर कम।

000

लोकसभा अध्यक्ष ओम बिरला संसद रा सियाळू सत्र रा कामकाज मांय आ रही अड़चन ने खत्म करण रा मकसद ऊं आज न्यारी—न्यारी सियासी पार्टियां रा सांसदां सागे मीटिंग कीनी। वे सगळा सदस्यां ऊं सदन री कार्यवाही ठीक तरीका ऊं चलावण मांय मदद करण री अपील कीनी। संसद भवन सामी खबरनवीसां सागे बातचीत करता थकां संसदीय कार्य मंत्री किरें रिजिजू कह्यो के ई महीना री 13 अर 14 तारीख ने लोकसभा मांय अर 16 अर 17 दिसंबर ने राज्यसभा मांय संविधान रा बारा मांय खास चर्चा व्हेला।

000

देश मांय साल 2014 री तुलना मांय मेडिकल कॉलेजां री तादाद दूणी व्हे ग्यी है। केंद्रीय मंत्री मनसुख मांडविया आज नई दिल्ली मांय आ जाणकारी दीनी। वे बतायो के साल 2014 मांय 387 मेडिकल कॉलेज हा, जो एक दशक मांय दूणा ऊं बत्ता व्हे र 780 व्हे ग्या। वे कह्यो के आयुष्मान प्रधानमंत्री जन आरोग्य योजना रा तैत 70 साल अर इण ऊं बत्ती उम्र रा बुजुर्ग ने ई मुफ्त ईलाज रो सुबीतो मुहैया करायी ज्यो है।

000

देश मांय लारला साल री तुलना मांय ई साल पराली बाळबा रा वाक्यां मांय 68 फीसदी री कमी आई है। पर्यावरण राज्य मंत्री कीर्ति वर्धन सिंह आज लोकसभा मांय एक सवाल रा लिखित जवाब मांय आ जाणकारी दीनी। वे बतायो के साल 2022 मांय पंजाब, हरियाणा, दिल्ली, उत्तरप्रदेश अर राजस्थान मांय पराली बाळबा रा 53 हजार ऊं बत्ता मामला सामी आया हा, ज्यां मांय ई साल ऐड़ा 12 हजार 530 मामलां री ठा पड़ी है। वे कह्यो के ई साल पराली बाळबा वाळा किसानां माथे जुर्मानो दूणो कर दियो ज्यो है।

000

प्रधानमंत्री नरेन्द्र मोदी दो ई महीना मांय दो दफा प्रदेश रो दौरा करण रो कार्यक्रम है। वे 9 दिसम्बर ने राइजिंग राजस्थान ग्लोबल इन्वेस्टमेंट समिट रा उद्घाटन सत्र मांय शिरकत करेला। ई रा कुछ दिनां पाछे वां रो राज्य री मौजूदा सरकार रा एक साल पूरो व्हेवण रे मौके जयपुर मांय राख्या जावण वाळा जळसा मांय शिरकत करण रो ई कार्यक्रम है। भाजपा रा प्रदेश अध्यक्ष मदन राठौड़ आज जयपुर मांय खबरनवीसां सागे बातचीत करता थकां आ जाणकारी दीनी। वे कह्यो के धर्म बदलबा ऊं जुड़यो कानून बण्यां पाछे प्रदेश मांय किण ई ने जबरदस्ती या बहला—फुसला र वां रो धर्म नी बदलायो जा सकेला। राठौड़ कह्यो के राइजिंग राजस्थान ग्लोबल इन्वेस्टमेंट समिट ऊं प्रदेश मांय निवेश ने नुवी रफ्तार मिलेला अर कारखाना लागण ऊं राज्य रो विकास तेज व्हेला।

000

राइजिंग राजस्थान ग्लोबल इन्वेस्टमेंट समिट रा संकल्पां रा तैत आज मुख्यमंत्री भजनलाल शर्मा पांचवां संकल्प रो ऐलाण कीनो। मुख्यमंत्री कह्यो के सरकार प्लास्टिक कम ऊं कम काम लेवण रो फैसलो कीनो है। वे कह्यो के सरकार प्रदेश मांय पर्यावरण संरक्षण रा प्रति संकल्पित व्हे र काम कर रही है। ई बीच दौसा मांय आज राइजिंग राजस्थान इन्वेस्टर मीट राख्यी ज्यी। इण मांय 2 हजार 94 करोड़ रुपया ऊं बत्ती रकम रा 95 करार करी ज्या। आं रे जरिये करीब पांच हजार 8 सौ जणा ने नौकरी-धंधा रा मौका मिल सकेला। कार्यक्रम मांय जिला रा प्रभारी मंत्री कर्नल राज्यवर्धन सिंह राठौड़ कह्यो के ई सम्मेलन मांय ऊर्जा, शिक्षा, मिनरल ग्राईडिंग, होटल अर पर्यटन, एगो प्रोसेसिंग अर चिकित्सा हलकां मांय निवेशकां सागे करार करी ज्या।

000

प्रदेश मांय बेगी ई नुवी पर्यटन नीति लागू करी जावेला। उप मुख्यमंत्री दिया कुमारी आज जयपुर मांय पर्यटन विभाग रा अहलकारां सागे मीटिंग पाछे खबरनवीसां ने आ जाणकारी दीनी। वे बतायो के नुवी नीति लागू व्हां पाछे निवेशकां ने न्यारा-न्यारा महकमां रा चक्कर नी काटणा पड़ेला अर वां रा काम आसानी ऊं व्हेला। दीया कुमारी कह्यो के जयपुर शहर ने और रूपाळो बणावण अर सैर-सपाटा री ठौड़ां सैलाणियां सारू बुनियादी सुबीता विकसित करण बाबत् तेजी ऊं काम चाल रह्यो है।

000

केंद्रीय मंत्री अर्जुनराम मेघवाल कह्यो है के बाबा साहेब डॉ. भीमराव अंबेडकर विषमतावां ऊं डर्या बगैर देश ने नुवो गेलो बतायो। वे आज बीकानेर रा रायसर मांय राख्यी ज्या “हमारा संविधान-हमारा गौरव” कार्यक्रम मांय बोल रह्या हा। मेघवाल कह्यो के संविधान स्वीकार करण रा 75 साल पूरा व्हेवण रा सिलसिला मांय सालभर कार्यक्रम राख्या जावेला। कार्यक्रम मांय खाजूवाला रा विधायक डॉ. विश्वनाथ मेघवाल कह्यो के देश रो संविधान मौलिक अधिकार देवण सागे कर्तव्यां री पालना री सीख ई देवे है।

000

अलवर रा सरिस्का बाघ अभ्यारण्य ऊं बाघ एसटी-2305 रे जयपुर ग्रामीण जिला मांय रासावाला किलचपुरी जंगलात हलकां मांय पूगण रा समाचार मिल्या है। जंगलात महकमा रा अहलकारां रे मुजब कैमरा मांय इण री फोटो मिली है अर सानकोटड़ा मांय बाघ रा पगां रा निशाण मिल्या है। ई जंगलात हलका मांय लगातार गश्त सागे निगराणी करी जा रही है।

000

अलवर मांय राज ऋषि कॉलेज कने जंगल मांय एक तेंदुआ निजर आयो है। जिला वन अधिकारी राजेन्द्र हुड्डा बतायो के कॉलेज रे आरे-सारे 50 हेक्टेयर ऊं बत्ता हलका मांय घणो जंगल है, जठे तेंदुआ रे छिप्यो व्हेवण री संभावना है। वे बतायो के तेंदुआ ने ढूंढबा री कोशिश करी जा रही है।

000

दिसम्बर रो महीनो सारू व्हां पाछे ई प्रदेश मांय फिलहाल जोरदार ठंड रो अहसास नी व्हे रह्यो है। एक-दो ठौड़ां ने छोड़ र घणखर ठौड़ां रात री बगत पारो 10 डिग्री सेल्सियस ऊं ऊंचो दर्ज करी ज्यो। बीती रात माउंट आबू मांय सब ऊं कम 6 दशमलव 4 डिग्री सेल्सियस तापमान दर्ज करी ज्यो। सीकर मांय 8 दशमलव 7 अर चूरू मांय 9 दशमलव 8 डिग्री सेल्सियस न्यूनतम तापमान दर्ज करी ज्यो। मौसम विभाग रे मुजब आवता चार-पांच दिन मांय तापमान मांय खास बदलाव रा आसार नी है। मौसम केंद्र जयपुर रा निदेशक राधेश्याम शर्मा बतायो के ई साल नवम्बर महीना मांय अधिकतम अर

न्यूनतम तापमान सामान्य ऊं ऊंचो दर्ज करी ज्यो। वे बतायो के चौमासा पाछे हाल ताई एक ई दफा बिरखा नी व्हेवण रे कारण ठण्ड रो असर कम है।

000

झुंझुनूं जिला रा नयासर मांय आज एक सड़क हादसा मांय एक कार रे मोटरसाइकिल ने टक्कर मार देवण रे कारण एक जणा री मौत व्हे गयी अर पांच जणा जख्मी व्हे ग्या। टक्कर पाछे बेकाबू कार एक दुकान मांय घुस गयी। हादसा मांय घणा जख्मी तीन जणा ने जयपुर रैफर करी ज्या, ज्यां मांय ऊं एक री मौत व्हेगी, जदके तीन घणा जख्मी लोगां ने जयपुर रैफर कर दिया ज्य, ज्यां मांय ऊं एक जणा री मौत व्हे गयी। जख्मी व्ह्या तीन जणा रो झुंझुनूं रा सरकारी अस्पताल मांय ईलाज चाल रहयो है। दूजी कानी नीम का थाना मांय मोटरसाइकिल सवार ने बचावण री कोशिश मांय एक जीप पलट जावण रे कारण 12 जणा जख्मी व्हे ग्या, ज्यां ने अजीतगढ़ रा अस्पताल मांय भर्ती करायी ज्या है।

000

गृह रक्षा संगठन रा 62वां स्थापना दिवस रा कार्यक्रमों री कड़ी मांय आज जयपुर मांय महिलावां री खो-खो होड़ राख्यी ज्यी। इण मांय गृह रक्षा प्रशिक्षण केंद्र जयपुर रा न्यारा-न्यारा सेक्टरां अर उपकेंद्रां री होमगार्ड स्वयंसेविकावां शिरकत कीनी। होमगार्ड ट्रेनिंग सेंटर री कमांडेंट सुमन ढाका बतायो के होड़ मांय सेक्टर 5 अर ग्रामीण री भेळी टीम जीती, जदके सेक्टर 1 अर 2 री भेळी टीम दूजा नम्बर माथे रही। स्थापना दिवस रा सिलसिला मांय कार्यक्रम सप्ताहभर ताई चालेला।

000

सीमा सुरक्षा बल-बीएसएफ रा 60वां स्थापना दिवस रा सिलसिला मांय आज बल रा क्षेत्रीय मुख्यालय बीकानेर मांय खास कार्यक्रम राख्यी ज्यो। ई मौके पौधा रोपी ज्या। ई पाछे शहर रा खास गेलां ऊं ऊंटों री रैली निकाळी ज्यी। सीमा सुरक्षा बल रा जवान, वां रा पिरवार वाळां सागे ओ दिन हरख-उमाव सागे मनायो। ई मौके बल रा उपमहानिरीक्षक अजय लूथरा बीएसएफ रा सगळा कर्मचारियां, अहलकारां अर वां रा पिरवार वाळां ने शुभकामनावां दीनी।

000

अंतर्राष्ट्रीय दिव्यांगजन दिवस रे मौके काल राष्ट्रपति द्रौपदी मुर्मू राष्ट्रीय दिव्यांगजन सशक्तिकरण पुरस्कार देवेला। 22 जणा अर 11 संस्थानां ने राष्ट्रीय पुरस्कार दे र नवाजा जावेला। ई मौके सामाजिक न्याय अर अधिकारिता मंत्री डॉ. विरेन्द्र कुमार दिव्यांगजन रा भला री केई योजनावां री सुरुआत करेला। प्रदेश मांय ई अंतर्राष्ट्रीय दिव्यांगजन दिवस रे मौके न्यारा-न्यारा कार्यक्रम राख्या जावेला। राज्य स्तर रो जळसो जयपुर रा हरिश्चंद्र माथुर राजस्थान राज्य लोक प्रशासन संस्थान मांय राख्यो जावेला। कार्यक्रम मांय भांत-भांत री श्रेणियां मांय चुणयी ज्या विशेष योग्यजन अर विशेष योग्यजन सारू काम करण वाळा लोगां अर संस्थावां ने नवाजा जावेला।

000

जयपुर रा राजभवन मांय आज असम, झारखंड अर नागालैंड रो स्थापना दिवस मनायी ज्यो। ई मौके राज्यपाल हरिभाऊ बागडे आं राज्यां ऊं आ र प्रदेश मांय रह रह्या लोगां सागे बातचीत कीनी। राज्यपाल वां रा सम्बोधन मांय कह्यो के राजभवन मांय न्यारा-न्यारा राज्यां रो स्थापना दिवस मनावण रो मकसद "एक भारत श्रेष्ठ भारत" री भावना ने मजबूत बनावणो है।

000